

長春子磻溪集卷之一

友一

御製

天地定位	陰陽協和	星辰順度	日月昭明
寒暑應候	雨暘以時	山嶽靖謐	河海澄清
草木蕃廡	魚鼈咸若	家和戶寧	衣食充足
禮讓興行	教化修明	風俗敦厚	刑罰不用
華夏歸仁	四夷賓服	邦國鞏固	宗社尊安
景運隆長	本支萬世	正統十年	十一月十一日



磻溪集序

友一

王峯老人講經四十年緣深未斷丙午春演
義易于條陰之北郊有三仙者自隴山來謁
我祇宮囊出一篇乃磻溪丘公長春舉揚玄
諦開誘迷朋而作也啓緘閱焉其文豪縱意

出新竒蓋匪俗學所能知者昔王官李樂然
與王峯俱出蘄秀覺之門而李自穎悟玄言
驚人非世才之所能窺既與序而傳之矣嘉
哉道之聰非世之聰也道之言非世之言也
何以徵之乎俗學者雖能鼓頰撫毫不過歌

詠情性搜邏景物至造理者明天人之際助
聖賢之教亦可與日月爭懸若夫悟真之士
特不斯然發無言之言上明造化彰無形之
形下脫死生信手拈來不勞神思空嗜自震
奮爲雷霆本文不作燦成斗星玉峯老人今
於群仙而證之不求高而自高不期神而自
神豈非一氣通徹六窻洞闢動容無不妙出
語總成真本來如是非假他通者邪如磻溪
集云手握靈珠常奮筆心開天籟不吹簫又
云頂戴松花喫松子松溪和月飲松風又云

徧撮山頭三伏暑都教化作一團冰又云有
無皆自定貪愛復何爲又云酒傾金靈滑茶
點玉芝香又詞云般般放下頭頭是選甚花
街并柳市虛空體本來一物無凝滯又云天
下周游身不動人間照了心無用又云踏盡

鐵鞋迷不出菴門透略舉二三數讀者當廣
知也嗚呼今之仙緣必宿有仙契者乎昔在
東菴與王風仙全真結緣在長安與馬丹陽
結緣去秋濟州人來與譚仙結緣唯丘公遠
處隴上是數者皆風仙之徒今悉得結其緣

非人力之所能致也雖然丘仙之道豈爲吾
而顯也蓋光輝之大世有不可掩者於是乎
亦得與結緣焉時大定丙午歲五月日中條
山玉峯老人胡光謙序

蘭生深林不以無人而不香鶴鳴九臯自然

友一

二

有聞而及外高人勝士或幽棲窮處甘枯槁
於山樊或混雜同塵肆沉淪於麀市雖室邇
而人遠覺心靜而地偏飄飄泛泛喻孤飛之
雲不繫之舟隱起滅於丹霄滄溟之際將何
往而不自適耶加之玄元爲師泰和爲友遐

襟曠跡淵停谷虛倣內觀之達人法勤行之
上士修真養命累功及人閒亦寄興言懷高
吟大著遵皇人之紫筆演大洞之空歌文辭
章句往往見於世焉是以蘭之吹香鶴之聲
聞乎我儀圖之今長春子丘公非斯人之徒
歟而誰歟公本登州棲霞人與劉公譚公馬
公俱圖學於終南王風子先生著名海上遠
近敬仰號丘劉譚馬若古祛惑論所謂神仙
道士若太上說養性得仙三十六法寂寞在
人間者也門人弟子齋公所作詩曲雜文來

謂序引余素未遂觀止臨江之表而獲觀雄
編嘉其恬淡閑逸縱凡儷俚無所拘礙若游
戲於翰墨畦逕外者不雕不琢匪丹匪青土
鼓蕢桴之不求響奏玄酒大羹之不事味享
知音知美其在斯乎唐蔣防稱淨福山廖冲

友一

三

曰仙書無文仙語無詞以心傳心天地不知
放情逍遙今古為誰予丘公復云時大定丁
未長至日文林郎前太常博士兼校書郎雲
騎尉致仕平陽毛麾序

且夫至道之妙不得以聲色求而不得以形

迹窺必賴至人爲馴致計摘章摘句俾得傳
誦之歌詠之而漸能游聖域而造玄門者也
然而句乏警策文無淵底則烏可以歆艷當
時而激勵後學者哉今見長春子丘公磻溪
集片言隻字皆足以警聳瞽而洗塵囂也寧

非生而穎悟未弱冠而志于道不寐者餘四
十載日記三千言身行萬里地三教九流貯
蓄於胷臆照耀於神識故也宜乎聲馳丹闕
有綸音之邀契偶真仙喜金鱗之得因知從
重陽之役者無慮千百輩唯丘劉譚馬四公

時為秀出然翹翹之譽獨有歸焉適有舊友
隴西公亨道自東萊直抵奉城郡署懇求集
序拜手而加穎者數四自知弓刀簿領之手
不足為形容髣髴然稔慕風聲恨未披際況
李侯之來引繩不可挹故讓之無計而勉書

數字時泰和丙寅歲重午後一日昭義大將
軍武定軍節度使兼奉聖州管內觀察使提
舉常平倉護軍漆水郡開國侯食邑一千戶
食實封一百戶移刺霖題

昔蒙莊著書三十三篇大率寓言藉外之論

後之談道者然以黠聰去羨頤神養氣為本
至於接物誘俗革頑釋蔽亦不免託默於語
東州高士長春子丘公世居登之棲霞未冠
一年游崑崙山遇重陽子王害風一言而道
合遂師事之王遺以詩有彼余緩緩收綸線

卷一

四

拽入蓬萊永自由其深入理窟可知已久之
與同志馬公譚公劉公陪從重陽子游南京
識者目丘劉譚馬為林下四友居無幾重陽
子捐館四人護喪歸殯終南廬於墓次服除
各議所之適惟公樂秦隴之風居磻溪廟六

年龍門山七年勾食飲以度朝夕聲名藉甚
大定戊申世宗皇帝聞之驛召至京師賜以
冠巾條服見於便殿前後凡四進長短句以
述修真之意上嘉歎焉及還山之後接物應
俗隨宜答問有詩頌歌詞無慮若干首文直
而理到信乎無欲觀妙深造自得者歟其徒
裒爲巨帙將鋟木以廣其傳謁文以冠篇首
愚以謂古隱君子有三槩或自放草澤名往
從之人主之尊猶物色而招訪或持峭行不
屈於俗雖有所應終不可縻以物務使人人

想望風采或資槁薄而樂山林逃空虛而不
返使天下常高其德不可加訾長春子兼而
有之宜乎以野服承聖問使四方懷想而企
慕焉非如放利之徒假隱自名欺愚誑瞽為
得計哉先生今在棲霞太虛觀未有承顏接

友一

五

膝之期所以序其崖略者庶他時邂逅不以
我為生客泰和戊辰閏四月望日翰林學士
中順大夫知制誥兼國子司業輕車都尉頴
川縣開國伯食邑七百戶賜紫金魚袋安東

陳大任序

礮溪集卷之一

棲霞長春子丘處機撰

七言律詩

秦川

秦川自古帝王州
景色蒙籠瑞氣浮
觸目山河俱秀發
披顏人物競風流
十年苦志忘高卧
萬里甘心作遠遊
特縱孤雲來此地
烟霞洞府習真修

礮溪

故人別後信天緣
浪跡西遊住魏川
宛轉風

塵過萬里盤桓巖谷泊三年安貧只解同今
日抱樸疇能繼古仙幸得清涼無垢地棲真
且放日高眠

礮溪鑿長春洞

我峩峻嶺接雲衢古栢參差一萬株瑞草不
容凡客見靈禽唯只道人呼鑿開洞府群仙
降鍊就丹砂百怪誅福地名山何處有長春
即是小蓬壺

幽居

臺邊水谷尤清曠野外山家至寂寥絕塞雲

收天耿耿空林夜靜月蕭蕭揚眉瞬目開懷
抱散髮披襟遠市朝自解偷生巖嶂窟誰能
闡化法輪橋

春曉雨

雨晴春色倍光輝風引泉聲出翠微宿鳥繁

友一

六

吟朝闔巧遊人遠適夜忘歸參差綠樹初騰
秀浩汗青苗乍長肥洞口時聞三島鶴天隅
來訪一蓑衣

堅志

吾之向道極心堅佩服丹經自早年遁跡巖

阿方十九飄蓬地里越三千無情不作鄉中
夢有志須爲物外仙假使福輕魔障重挨排
功到必周全

自詠

自遊雲水獨崢嶸不戀紅塵大火坑萬頃江
湖爲舊業一簑煙雨任平生醉來石上披襟
卧覺後林間掉臂行每到夜深雲霽處蟾光
影裏學吹笙

答甘北鎮孟秀才

乃虔州也

一別家鄉整十年飄蓬雲水入秦川衣寬放

蕩秋來補食飽蕭條夜處眠陝右不干浮世
事天涯曾遇大羅仙功虧未得長生信坐待
嘉音曠峪前

答李四秀才邀住渭北

彼有詩年前
曾許過河來

本來今歲合雲遊性劣那堪道未周故我身

友一

七

心隨日月與他巖壑度春秋深承虢邑多才
士遠訪磻溪遁跡流不在相邀居北郭此中
亦可論真修

道友邀遊磻溪太公廟以詩辭之

自無狂興不追遊識破諸餘萬事休誰向磻

溪消鬱悶閑居巖壑且淹留昔違海上三千
里曾涉途中二十州看盡名山無限景大都
身外沒堪酬

碻溪廟覓駝馬

聞說碻溪隱太公巖高樹密壯祠雄花朝石
窟龍吟霧月夜山門虎嘯風萬載熊羆名不
朽三春駝馬獻無窮將詩爲覓千餘尺染翰
聊爲度日功

答宰公子許秀才

森森綠檜鎖天涯峭壁中藏野客家碧洞經

年無火燭青山終日有煙霞
虛心實腹唯求飯待客迎賓
不點茶自樂安閑微得趣
門風何足向人誇

答清河氏

神明雖是落凡胎氣直終須
有道材只恐丹砂臍下去重
教白雪耳邊來如何脫免紅塵
境似我登臨碧嶂臺步步嬉
遊天漢出時時騰踏野雲開

贈涇州跌跌郎中暨劉解元

凡爲道友欲相尋不用浮財
禮數欵俗物光

輝難買道人情拘束易勞心
踈慵寡學文章淺淡泊幽居
歲月深格外閑愁都絕想雲
中來聽一高吟

贈王周二生見訪

二公何事挈槃餐出郭
嬉遊草莽間宛轉尋

友一

八

村來訪道因循樂道暫偷閑
深知舊有逍遙志遠看虛無
萃律山盡日開懷恣談笑
夜深同步月明還

衆道友問修行

余今蹤跡任蹉跎寧論修行
事若何道眼無

光慵入市天心難合且隨波飢時只解巡門
乞飽後兼能鼓腹歌除此一身愚作外萬般
餘事不知他

寄道友覓敗布故履余在西號六年
未嘗一新衣履每至中秋唯完補褐

納耳

秋風忽起雨天涼木葉蕭疎草漸黃褐衲懸
鶉唯闕補芒鞋伏兔不能狂有身易着饑寒
苦無福難逃日月長但願諸公懷惻隱扶持
同步入仙鄉

次韻銀張八秀才

鬱鬱煙霞滿谷中
冥冥心跡體虛空
長歌愛
歷臨春水獨坐看
雲對曉風遠害誠能依道
力施恩未解接神功
經書突與君常究
返照
何須更繫東

號縣銀張五秀才處借書

友一

九

盛族文章舊得名
芝蘭玉樹滿堦庭
光輝代
代生豪傑講論時
時聚德星顧我微才弘道
晚知君博學貫心靈
嘲吟不用多披覽
續借
閑書混杳冥

中秋不見月

幾年明月不昭彰
玳席虛勞設萬方
每恨他時遭雨隔
那知今夜復雲藏
仙娥莫是簪花
睡玉兔還爲搗藥
忙世俗歡娛無所益
冥冥物外且韜光

見月

沉沉雲退晚風幽
皎皎蟾光奮九州
萬里碧天清照夜
四郊黃葉冷飛秋
高空似覩蝦蟆
墓現大野還知魍魎
囚脫灑圓明孤且
潔飄飄塵外不淹留

王宅月桂借其義也

太原門下景幽深一簇仙花壓古今根幹發
從雲上面祖宗來自月中心香苞灼灼披紅
粉茂葉重重鎖綠陰朶朶精神皆異俗飄然
特使衆人欽

又栽月桂

匠手親封月桂栽幽人自植寶花臺靈根妙
絕非凡種秀氣沖和是道材日月交流千古
異乾坤獨王四時開英賢好顧長春景莫把
群芳一類栽亦作猜

山居 三首

龍門峽水淨滔滔南激朱崖雪浪高萬壑泉
源爭湧湊千巖石壁競呼號周流截斷紅塵
境宛轉翻開白玉膏勝境無窮言不盡臨風
時顧一揮毫

友一

十

不怨深山自採樵山中別有好清標幽居石
室仙鄉近不假環墻世事遙飲食高呼天外
鶴摩雲仰看峽中鷗時時皁白浮沉景顯貫
真空慰寂寥

獨自深山益

音隘

寂寥閑雲作伴屏喧囂耽慵

不念生涯拙好靜唯便熟境銷著假空貪齊
李杜明真何必等松喬研窮壽筭文章力豈
奪虛無造化標

芭蕉隴山也

一葉青牋仰掌開三湫白浪散花迴山有禹廟下俯

三湫日中有客頻來賞月下無人獨自陪造化

乾坤難比大草木之中唯蕉葉最大尋常風雨莫教摧

留君日日當金案與客時時慶玉杯茅君學道於齊

不見使人而金案玉杯自來人前

讚丹陽長真悟道

馬氏譚君達聖朝疑情萬古一時超雲中採
藥烹金鼎火後收丹貯玉瓢手握靈珠常奮
筆心開天籟不吹簫看看跨鶴乘風去海上
人間影迹遙

鶴

一種靈禽體性高丹砂為頂雪為毛冥冥巨
海游三島矯矯長風唳九皋灑落精神超俗
物飛騰志氣接仙曹搏風整翮雲霄上萬里
崢嶸自不勞

嶺北西京留守夾谷清神索

東海踈狂猶目斷西京留守未心開去年奉
勅三冬往今夏齋書九月來北地官榮何日
罷南山道隱幾時迴直須早作彭城計燕國
家風自不墮

彭城乃海
蟾公也

易州西山睽公堂

高高雲外睽公堂閃閃雲霞照洞光千仞峯
巒排左右萬株松柏互低昂山翁不解談今
古野客時來講混茫休道一生空打坐也勝
塵世走忙忙

福山縣黃錄醮感應

并序

明昌甲寅秋九月建黃籙于福山縣二十
八日午後將傳符受戒有鶴十一翱翔乎
壇上終夕不去越一日設醮聞天關震響
北極下紅光燭地可辨纖悉士民靡不見
者

華燈照耀積金山人在蓬壺咫尺間下土傾
心開地府高真威力動天關千門列祭嚴香
火萬口同聲啓笑顏三界十方功德備彩雲
仙鶴自迴還

承安丁巳冬至後苦雪時有事北邊

冬前冬後雪漫漫
淑氣銷沉萬物乾
出塞馬驚山路險
防邊人苦鐵衣寒
雖愁海北邊靈
苦幸喜山東士
庶安日費國資三十萬
如何性命不凋殘

平山堂

四首
棲霞
太虛觀也

友一

十二

年年三伏上平山
山上遊人絕往還
目視青霄雲澹澹
身橫碧落性閑閑
孤高迥出林巒表
曠望殊非海岱間
白日紅塵車馬客
誰能到此一凭欄

山堂高潔倚天涼
天外清風入坐長
青鳥有

時來顧盼白雲終日自飛
金壇玉宇知何在
絳闕瓊樓古未詳
爭似山家休歇去
身心不動到仙鄉

山堂書靜客來稀
巾坐亭亭列翠微
碧漢無瑕紅日轉
青山不動白雲飛
參差萬有彰神化
渺邈三靈合範圍
終始蓋由清淨道
人能天地悉皆歸

三竿紅日眠猶在
十里青山坐對閑
不覺人來幽圃外
時驚犬吠白雲間
無心自得成長往
了一何須問大還
只恐逡巡下天詔
悠揚

無計樂平山

聊戲之耳

海上觀濤

大風時起北溟寒萬里驚濤輓雪山怒色衝
天昏氣象雷聲出地駭塵寰江神洶浪潛輸
欵河伯威靈溢汗顏白馬素車空有勢非仙
無路可躋攀

題諸潘菴

登郡西南十里餘大開泉石致幽居山深海
闊相依映地僻雲閑任卷舒夾道清池通熠
燿倚天高柳挂蟾蜍鳴琴坐對煙霞客笑指

勞生一夢虛

中秋日與道友遊諸潘時有將赴秋

闡者

爽氣清高暑氣闌園林欲變錦紋斑長風渡
海來沙漠短晷經天下玉關設席邀賓龍樹
側鳴琴待月虎溪間良朋自得真佳趣不待
蟾宮把桂攀

秋旦與蓬萊道友游西溪

臨水登山跨曉風虛心瞪切丈證目俯秋空雲
迷海嶠沉沉碧日射天輪燦燦紅游興不隨

他物轉和光聊與世塵同三年四度乘嘉會
又到山西漲海東

途中作明昌二年十月余到棲霞三
年五月蓬萊道友相邀度夏自後數
年為例五月相邀耳

年年五月到蓬萊麥秀金銀花也次第開野客
充飢饒紫萁行人止渴待黃梅雲頭勃勃連
山聳雨脚泔泔拍海來朱夏勝遊多壯觀情
如天網亦恢恢

送陳秀才完顏舍人赴試首二

六合之中萬物生人於萬物最高明能窮物
外陰陽數解奪人間富貴名自昔丹砂唯九
轉而今天路只三程謂今三試謫仙才調無留滯
坐看飛騰上太清

丈夫高節氣凌雲十載潛看萬卷真滿腹詩

友一

十四

書雖合道出群頭角未驚人奔牛計策元無
敵立馬文章自有神異日功成心爽悟黃梁
驚覺夢中身

泰和辛酉清明後三日霜

雨後方看麗景韶風前忽耳萬花凋園林一

夜無顏色氣候三春太寂寥正遇東君時作
巧那堪青女勢還驕生靈跋扈知難免造化
根源尚未超

落花

昨日花開滿樹紅今朝花落萬枝空滋榮實
藉三春秀變化虛隨一夜風物外光陰元自
得人間生滅有誰窮百年大小榮枯事過眼
渾如一夢中

赴蓬萊狄氏醮踏曉登山

鷄鳴喔喔動精神閉息登山上湧身路惡纔

分瞥竊道林深不辨往還人披雲直下觀東
海絕頂孤高映北辰日用孳孳為善者虛心
牢落且同塵

赴濰州北海醮

温迪罕
千戶請

北極陰風渡海扇海山風物盡蕭然山陰積

友一

十五

雪寒鋪地海上層冰凍接天鴻鵠預辭千里
塞蛟龍深卧九重淵道人守拙何為耳酷冒
冰霜赴醮筵

昌陽黃籙醮

十月昌陽五穀饒追思黃籙建清標華燈羽

服羅三殿絳節霓旌下九霄法事昇壇千衆
集香雲結蓋萬神朝從茲降福穰穰滿一縣
潛推百禍消

過蓋公峴山

峴石崎嶇馬不禁溪風蕭颯虎難尋山橫劍
戟參差大氣鬱煙霞暎藹深道衆不游閑景
色六涯都是好叢林因循北海修黃籙宛轉
東山不謁翠岑

避事過蓋公峴

乘閑杖策躡仙蹤度石穿林望蓋公西海有

雲波慘澹東山初日氣濛鴻崎嶇萬壑深潛
跡罕落三州暗轉蓬出處自非心染着從教
著禱打虛空

驟雨

萬疊濃雲靄靄屯千尋白雨下山門陰陽氣
激風雷急草木聲號宇宙昏鳥獸相迷煙慘
慘魚龍交錯水渾渾一時造化驚天地咫尺
中間孰見根

季冬八日大雪

二首

昨夜南風又北風曉來天地一濛鴻零珠碎

玉隨高下萬壑千巖合異同日月不知安頓
處山川塞在杳冥中返觀性命陰陽理始識
虛無造化功

昨夜南風又北風曉來天地一濛濛山村野
店家家異柳絮梅花處處同石室松堂雲歛
後瑤臺瓊榭月明中何須更問豐年瑞祇此
深佳大道功

友一

十六

酬同知定海軍節度使張侯雪中見
訪首二

法宇沉沉不下幃清齋兀兀坐忘機紛紛滿

地天花落浩浩盈山海月微淡日悠揚金殿
曉衝風散漫玉塵飛三冬瑞雪真嘉慶萬古
何人識是非

瑞雪飄飄野興濃開門杖策久從容貪看六
出瑤花墜不覺三清寶殿封暗室郊原彰玉
馬斜拖闕角隱金龍高人冷冽寒巖下莫辨
遙山第幾重

竹軒太虛
觀也

小軒幽檻不栽花只種琅玕度歲華直節自
非凡草木虛心真合道生涯風吹瑟瑟香還

冷雨洗涓涓淨雨
嘉不待歲寒方見重
吟窓朝夕思無邪

登臨有感

陟彼高崗馬足蹶
觀乎大地我心搖
山河氣象連天闊
洞府神仙避世遙
白玉黃金終莫

友一

十七

守春花秋月固難饒
百年一覺浮生夢
萬事俱非恨寂寥

定海軍節度使致政劉師魯挈其子
見訪于棲霞太虛觀

數騎翩翩出郡城
西風搖蕩菊花清
吟詩馬

上無橫梨訪道人間暫濯纓露下天高秋氣
爽金聲玉振曉霞明山堂盡日蕭然坐似覺
浮生夢且輕

師魯先生有冥息之所榜曰中室又
從而索詩

一陰一陽之謂道太過不及俱失中道貫三
乘玄莫測中包萬有體無窮高人未悟猶占
僻下士能明便發蒙儒釋道源三教祖由來
千聖古今同

次韻答奉聖州節度使移刺仲澤佳

什

忘機不用苦清談
大隱何煩住小菴
海印發光吞寶月
天心燭物邁寒潭
黃庭雅弄琴三疊
紫府高吟酒半酣
西北文章賢太守
肯將珠玉寄東南

送蓬萊州節度使鄒應中移鎮兗州

人生七十古來稀
不夜功成賦式微
便欲休官栽菊去
還令杖節與心違
行藏未出陰陽數
夙夜難逃變化機
異日挂冠須在早
莫教林下有人譏

讚道

造物悠揚氣勢雄三光日夜轉鴻濛冥冥會
合陰陽秀矯矯神奇幻化叢春去秋來生殺
異天長地久古今同靈臺有箇真消息未悟
那堪性不通

達士

隨機接物外同塵應變無方內入神心地出
離三界苦洞天游賞四時春金丹大藥經年
久火棗交梨逐日新一服定超生死海不知
誰是有緣人

靈虛觀賞梨花

妙景從來說武官周天迴
幹暮春看千株白
錦凝霜雪一派香
風吐麝蘭羽客徘徊昇月
榭高真依約下星壇
神功暗結靈虛秀
化作無邊碎玉團

舊遊

秦川渭水好行程
不問長亭及短亭
西嶽雲開仙掌白
南山雨過佛頭青
丹霄髣髴舒晨彩
碧岫參差列畫屏
海上交朋聞我道
虛心側耳盡來聽

磻溪集卷之一

女



